

Readings: Is. 55:6-9; Ps. 145:2-3, 8-9, 17-18; Phil. 1:20-24, 27; Mt. 20:1-16

Christu sungah kongit thuzui nu le pa, u le naute, Lai Siangtho lui sungah, Israel innkuan pen Pasion' leenggah huan hi a, lametna lianpi tawh a suan leenggui kungte ahi hi. Tua ahih manin, "Amah in thutanna lamena a, ahih hangin sisan luanna kimu in; thumanna lamena a, ahih zongin kahna aw ging kiza hi", hong ci hi (see Is. 57: 27:2-5).

Israel mite in Topa' lamet gah hoih gahphate hong gah loh tak ciangin, Pasion in Israel, a leenggah huan pen, minam dang Kumpite' bawlsiat totciilnate thuk sakin, amaute' khut sungah saltanna hong thuk uh hi (see Ps. 80:9-20). Ahih hangin, Yahweh Pasion in, "a gam uh ah amaute ka koih kik dinga, tua ka piaksa gam panin kuamah in amaute lakhia kik ngei nawn lo ding hi. Israel aadingin daitui ka bang ding hi; amah in unok pak bangin pak dinga, Lebanon gam bangin kip ding hi. A dawnte mengkhia dinga, a meel hoihna olive kung bangin, ama namtuina Lebanon taamtaak kung a bang ding hi, Topa note' Pasion in ci hi", hong ci ngiat hi (see Amos 9:15; Hosea 14:5-10). Tua ahih manin, khat veivei i mawhna sungah hong nusia, hong taisan tawh a kibat hangin, i biak Pasion pen, mawhneimate hong nusiap hong taisan dieldel Pasion hilo-in, hong zong hong cing hong kem, hong don hong khoi, amaa liim leh vang nuai ah, hong huai hong pom i Pasion ahi hi.

Pasion in, a tul ngeilo a itna tawh amaa gamh luah dinga a tel, Israel minamte a itna siksian in, tuni Lungdamna Lai Siangtho sungah zong Topa Jesu in gupkhatna tangthu luanzia hong gen ahi hi. Pasion in leenggah huan neipa hi a, leenggah huan pen amaa gam ahi hi. Khuavak tunga a kicial nasemte pen, amah tawh thuciamna a bawl masakpih Israel minamte hi a, sunkim nikaai lam a a kicial nasemte pen, minam dang, Topa Jesu hong pai mateng Pasion a neilo, lametna zong a neilo, thuciam thak a ngak Gentile lawkite ahi uh hi. (see Eph. 2:11-13). Topa' thusiamna bek tawh, ei nam dangte khempeuh in, teluam Israel minamte mah bangin, gamh luah za hong ngah sak hi. Hih in, mizawng daipaam, meigong tagah, nampi namneu, maitom maisau a en lo, deidana a neilo, a huamkim, telzawh loh Pasion thusiamna, hong itna leh gupkhatna thu luanzia ahi hi.

Tua ahih manin, Pasion in mawhneite hehpih siamin, a bawlsa na khempeuhte itna tawh a kepna phawk a, amaa leenggah huan sungah a om nailo i sanggamte,

amaa itna leenggah huan, i Pawlpi sungah i tunpih/lutpih zawh nang, amaute tawh Topa tungah lungdam koin i phat khawm theih nadingin hanciam ni. Tua in, Topa' thuphate sansiamna le nuntakpih siamna ahi hi.

Tua ahih manin, Misiangtho Paulu in, "Lungsim cihtakna le Topa kihtakna/itna tawh thu na mang un. Mihingte' nasem bangin kingaihsun loin, Topa' na a sem bangin kingaihsun unla, na sepa khempeuh uh ah hanciam takin sem un. Tua hi leh Topa' tung panin thaman na lsang ding uh hi", Topa' n hong ci hi (Col. 3:23-24). Tua ahih manin, tuni-in, Topa' ading matai tak leh lawptakin, i nisim vaipuakte i sem hiam? Eite tungah huhna hong ngente huhna i pia zo hiam? Lungleng khuangai a, kep ding don ding a, a kilawmte i donkhial, i kemkhial kha hiam? "Topa aw, nang mah leh huhna a kism ka lawm ka gualte lungdam maitaai taka ka huh zawh nadingin, na Kha Siangtho hatna hong guan ta in. A ngah nuampa/nu ka hih ding sangin, a pia khia nuam, a pia khia zo pa/nu hong hisah ta in ci-in thungen ni.

Tuni Lai Siangtho masa sunga khamsangpa Isaiiah hong thu gente i zak ciangin tha i ngah mahmah hi. Amah in Topa a kimuh theih lai, i nai ah a om lai-in thu ngen un hong cih mah bangin, Topa i mit tawh i muh theihloh hangin, eite tawh om khawm tawntung a, i thungetnate zong hong dawng den ahih lam hong theisak hi. Topa in mawhneite a mawhna tawh a sih ding uh a deih hilo, kikhelin ama kiang a zat kik ding bek a deih ahi hi. Kamsangpa in Topa' lungnem lungduaina le hong itna pen gupna i ngah nadingin i zat siam ding deihsakna tawh hong gen, (2008) hong pia ahi hi. Tua hi a kipuah phat ding akul aom te ahun aom lai, i nunna ni a taan lai-in kipuah pha pah ni. Hun tampi om lai cici nawn kei ni. Vai nunung guahsia in lamp cih paunak i tuah khak ding, i ziakai khak ding lauhuai mahmah hi.

Eite in khat veivei damloh khatpeuh, kamsiat leisiat, supna baina khatpeuh i tuah khak ciangin, Topa tungah khasiatna, lungkhatna, uplahnate i nei thei kha zel hi. Hih bangin lungkham dahna i tuah ciangin, eima ngaihsutna bek tawh khensat loin, kei ngaihsutna sangin Topa' ngaihsutna sangzaw, kei' itna sangin ama hong itna lianzaw, hoih zaw, pha zaw, ama deihsakna ka tel zawhloh man hi. Kei ading ahoih pen a hong gelsakna hi ci a, lungkim taka i san theih ding i kihehnep theih ding thupi-in kism mahmah hi.

Lai Siangtho nihna sunga Misiangtho Paulu in Philipi khua a om thuzuite tungah, "Ka si a, ka hing zongin kei ading a phat mawhna bangmah om lo hi" ci hi. Misiangtho Paulu in amah si leh Topa tawh kimu ding cih a ngaihsut ciangin a si nuam hi a, ahi zongin mitampi Pasion' gam sungah lutsak nuam, thuzui suakthakte pantah nuam lai ahih manin, a nungta nuam lai bek ahi hi. Misiangtho Paulu in, eite

zong ama lungsim bang i nei ding adeih man hia, leitung ah ka thuk gentheih na khempeuh ii thaman in Christu hi, a ci ngampa ahi hi.

Tuni Lungdamna Lai Siangtho sungah zingsang tuung, sun, nikai le nitak lam a leenggah lo kuante thaman a kibangin lo nei Topa in pia cih thu i za hi. Hih in bang hong theisak nuam hiam cih le Pasion' gam sungah amasa anununng cih deidanna omlo, avekpi-in a kibang ahi hi cih hong theisak nuam ahi hi. Tua in, i telzawhloh amaa thusiam thukhuaina le hong it hong huaina ahi hi. Thupha tam a bawlte a kham lukhu uh a taang zaw ding hi bek hi.

Topa' deihsak bulpi in a piangsaksa mihing khempeuh amah tawh mangkhawm tawntung ding cih thu ahi hi. Bangzah takin migilo, misia/poi, mi mawhnu/pa ahi phial ta zongin, kisikkikna lungsim takpi tawh amah azuan mite nguakuksak lo, nolh ngeilo ahihna hong theisak hi. Topa tawh a kikhakhawm lungsim kikhel misuampa in a sihma-in Topa zuan man ahih manin ahun lap pa, nai nga pawl a leenggah lo kuanpa tawh a kibang hi a, a thaman zong a dimin a ngah pa ahi hi.

Mt 26:39 Topa Jesu in zong, "Pa aw, hih hai in kei tawh a kipelh zawh leh, hong kipelhsak in. Ahih hangin keima deihsak bang hi kei hen. Nangma deihsak bang hi ta hen, ci a thu anget mah bangin, eite in zong ka nuntakna nang a hi, Top ana deihsak bangin piang ta hen i cih zawh nading inthu ngen ni. Gal 2:20 Ms. Paulu in, kei a anungta hinawn lo, Jesu Khri ka sungah nungta hi a cih mah bangin, eite in zong, Paul mah bangin i nuntak sungin amaa lungsim leh nuntakzia i nei zawh nadingin hanciam ni. Topa' hoihna phatnate tungah lungdam kohsiamin, amah tawh anne khawm, tuidawn khawmte leh a nungta khawm, a kalsuan khawmte i hih zawh nadingin thungenin hanciam ciat ni.

U le nau te, i kilawmna thel/neng/mal khat zong omlo napi Topa in ama lenggah lo ah na asem dinga hong sap manin lungdam kipakin i nasepnate ah itna leh cihtakna tawh sem ciat ni. Mihoih midikte' thungetna in vangnei a, Pasion' maiah anamtui-in tung hi. Tua ahih manin, ei Pasion' tanu/tapate in thu i nget ciangin, ei a ding bek ngen lo in midangte ading, cina luna, meigong tagah, mizawng daipaam, simmawh ciilphihsa a thuk te leh a kinawl khinte adding; a diakdiakin mawhna khuazing sunga a om mite, hong mudah hong langpangte a kikhel theih nading, Covid-19 natna abesiayang theih nading le leitungah kilemna a om nadingin i lungsim tawng panin thungen ciat ni.

Jesu Christu tungah phatna om ta hen.